


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-72	Al-Jin	28	2	Makkiyyah	Ke-72	3



Zaman Diturunkan

Surah al-Jin berkemungkinan diturunkan bersama Surah al-Ahqaaf iaitu ketika perjalanan pulang Rasulullah daripada Tha'if di suatu tempat bernama Nakhlah, sekitar bulan Syawwaal tahun ke-10 Kenabian. Ketika itu Rasulullah s.a.w. bersama ahli keluarganya sedang diboikot oleh masyarakat kafir Quraisy dan Baginda terkepung di Syi'bi Abi Thalib, setelah terlepas daripada suasana itu, Rasulullah s.a.w. kehilangan isteri tersayang Khadijah dan bapa saudaranya Abu Thalib. Pada ketika itu sikap orang-orang musyrikin terhadap al-Qur'an sangatlah teruk dan penuh dengan keta'shuban, tiba-tiba beberapa orang jin memeluk agama Islam, ia memberi semacam nafas baharu. Orang-orang musyrikin Quraisy diingatkan kembali dengan al-Qur'an yang penuh dengan kesan yang sangat mendalam kepada jiwa manusia dan mereka diseru kembali kepada ajaran tauhid. Selain itu mereka juga diperingatkan kembali kepada kedudukan kerasulan dan faedah serta kebaikan di dunia dan di akhirat yang akan mereka dapat sekiranya mereka beriman.

Beberapa Ciri Khusus Surah Al-Jin

1. Surah ini mempunyai iramanya tersendiri yang cukup menarik.
2. Melalui surah ini seruan kepada 'aqidah tauhid, kerasulan dan kepercayaan kepada hari akhirat diulangi dalam bentuk dan penampilan yang baharu.
3. Di dalam surah ini manusia diperintahkan supaya menggunakan kebebasan memilih yang diberikan kepada mereka dengan sebaik mungkin, kebebasan memilih hanya diberikan kepada 2 jenis makhluk sahaja iaitu manusia dan jin.

Perkaitan Surah Al-Jin Dengan Surah Sebelum Dan Selepasnya

1. Di dalam Surah Nuh sebelum ini, adab dan disiplin da'wah telah disebutkan, di dalamnya disebutkan kisah benar da'wah Nabi Nuh yang begitu lama dan panjang tetapi kaumnya tetap mendustakannya, di dalam Surah al-Jin ini pula tersebut kisah golongan jin yang memeluk agama Islam dan membenarkannya, manusia dinasihati supaya mengambil pengajaran daripada golongan jin yang bersedia memeluk agama Islam itu.
2. Di dalam Surah al-Muzzammil akan datang disebutkan beberapa peringkat yang perlu dilalui selepas seseorang itu beriman, dengan bertahajjud, berbelanja di jalan Allah, ingat kepada Allah dan beristighfar kepadaNya. Seseorang akan dapat beristiqamah di atas ajaran tauhid setelah memeluk agama Islam.

Beberapa Kata Kunci Dan Tema Utama Surah

1. Seruan kepada `aqidah tauhid (Ayat: 3, 12, 18 dan 20).

(Ayat: 3).

وَأَنَّهُ تَعَالَى جَدُّ رَبِّنَا مَا اتَّخَذَ صَاحِبَةً وَلَا وَلَدًا ③

3. Dan (ketahuilah wahai kaum kami!) Bahawa sesungguhnya: tertinggilah kebesaran dan keagungan Tuhan kita daripada beristeri atau beranak.

2. Penafian, penolakan dan keadaan tidak percaya kepada hari akhirat dan kerasulan (Ayat: 7).

وَأَنَّهُمْ ظَنُّوا كَمَا ظَنَنْتُمْ أَن لَّن يَبْعَثَ اللَّهُ أَحَدًا ⑦

7. Dan bahawa sesungguhnya (tidaklah benar) manusia menyangka sebagaimana yang kamu sangka, bahawa Allah tidak sekali-kali mengutuskan sebarang Rasul (atau tidak akan membangkitkan manusia pada hari kiamat).

3. Di dalam surah ini, kerja-kerja seorang rasul diperjelaskan, kerja rasul ialah menyampaikan hidayah yang diberikan oleh Allah kepada manusia (Ayat: 23).

إِلَّا بَلَّغْنَا مِنَ اللَّهِ وَرِسَالَاتِهِ وَمَن يَعْصِ اللَّهَ وَرَسُولَهُ فَإِنَّ لَهُ نَارَ جَهَنَّمَ خَالِدًا فِيهَا أَبَدًا ⑬

23. "(Aku diberi kuasa) hanya menyampaikan (wahyu) dari Allah dan perintah-perintahNya (yang ditugaskan kepadaku menyampaikannya); dan sesiapa yang menderhaka kepada Allah dan ingkarkan bawaan RasulNya, maka sesungguhnya disediakan baginya neraka Jahannam; kekalah mereka di dalamnya buat selama-lama."

(Ayat: 28).

لِّيَعْلَمَ أَن قَدْ أَبْلَغُوا رَسُولَاتِ رَبِّهِمْ وَأَحَاطَ بِمَا لَدَيْهِمْ وَأَخَصَّى كُلَّ شَيْءٍ عَدَدًا ⑳

28. "(Tuhan mengadakan malaikat-malaikat itu) supaya Ia mengetahui bahawa sesungguhnya - (dengan jagaan mereka) - Rasul-rasul itu telah menyampaikan keputusan-keputusan Tuhan mereka, (dengan sempurna); pada hal Ia memang mengetahui dengan meliputi segala keadaan yang ada pada mereka, serta Ia menghitung tiap-tiap sesuatu satu persatu".

4. Di dalam surah ini juga manusia diingatkan dan diberitahu tentang faedah-faedah dan kebaikan-kebaikan di dunia dan juga di akhirat yang akan diperolehi orang-orang yang menerima `aqidah tauhid dan beristiqamah atas `aqidah itu. Dikatakan orang yang beristiqamah atas `aqidah itu akan dikurniakan kemewahan hidup (Ayat: 16).

وَالَّذِينَ اسْتَقَمُوا عَلَى الطَّرِيقَةِ لَأَسْقِيَنَّهُمْ مَاءً غَدَقًا ﴿١٦﴾

16. (Nabi Muhammad diwahyukan menerangkan lagi): "Dan bahawa sesungguhnya! Kalaulah mereka (manusia dan jin) itu berjalan betul di atas jalan (Islam), sudah tentu Kami (akan memberikan mereka sebab-sebab kemewahan, terutama) menurunkan hujan lebat kepada mereka.

5. Makhluk jin juga diberi kebebasan memilih seperti manusia, di kalangan mereka juga ada yang Islam dan ada قَاسِطُونَ (golongan yang zalim / kafir) (Ayat: 14). Golongan jin yang zalim, seperti manusia juga akan dimasukkan ke dalam neraka jahanam.

وَأَنَا مِنَ الْمُسْلِمِينَ وَمِنَ الْقَاسِطِينَ فَمَنْ أَسْلَمَ فَأُولَٰئِكَ تَحَرَّوْا رَشَدًا ﴿١٤﴾

14. Dan bahawa sesungguhnya (dengan datangnya Al-Quran, nyatalah) ada di antara kita golongan yang beragama Islam, dan ada pula golongan yang (kufur derhaka dengan) menyeleweng dari jalan yang benar; maka sesiapa yang menurut Islam (dengan beriman dan taat), maka merekalah golongan yang bersungguh-sungguh mencari dan menurut jalan yang benar,